

德壯果公年譜

德壯果公年譜卷三十一

次孫花沙納恭纂

嘉慶十一年丙寅

九月十八日

公奏言

臣

於十一十二等日接據探報叛匪全隊二千餘

人乘夜陸續俱出大峪因有滿營馬隊分布防堵仍沿山西竄子午峪又探知總兵楊芳之兵將出峪口該匪遂亦西竄跟上前隊賊蹤初六日由鄧縣之宋村杜家莊一帶直逼縣城南門攻撲該縣城內有臣先行派往防守之軍標一百名在彼當經知縣胡晉康會同軍標千總羅萬春

及本城把總教職佐雜等督率兵丁民壯連用槍石擊打賊匪分投復至東西兩面攻撲城上用槍礮擊斃賊匪十數人民勇王祿用石打賊被賊礮轟死賊匪在近城及關廂一帶焚掠時近一晝夜未退初七日晚楊芳由子午鎮帶兵趕到該匪遂退至離城五里之白楊寨屯聚時已昏黑楊芳之兵亦卽在近賊之處屯紮該匪於半夜連撲營盤五次楊芳首先督率所帶新兵奮力擊打左膀被賊矛戳傷雖已穿透尙不甚重兵丁帶傷數名因見本官受傷抗拒益力將賊連次擊退初八日黎明時甯夏總兵汪啟挑帶甯夏騎馬備弁趕到副都統祥保挑帶馬隊數百名

起來接應將軍扎勒杭阿亦帶領馬步官兵馳往聲援賊始稍退楊芳官兵出營追賊生擒騎馬賊目王允吉一名散賊陳保泰李才二名割獲戴藍頂花翎賊匪首級一顆賊隨竄逸已離城三十餘里等情查臣前因新兵難信而楊芳平日尙能籠絡駕馭是以

奏明令其管帶一千數百名自爲一路勦賊不合搭配陳兵藉以覘其向背今楊芳能首先督率迎敵帶傷後並不退縮俾新兵等齊心用命尙知愧奮自贖而新兵竟能合力相持實已與賊勢不兩立不惟反側之意已消並可堅其殺賊之念似此情形賊匪斷難煽誘帶兵之員即可專力

任用卽使與陳兵合隊彼此亦不致猜嫌臣等於會兵合
剿之時亦可免一切顧慮成功必速洵堪上慰

聖懷現據整屋縣稟報該匪由該縣祖安鎮焦家鎮竄至接觀壩
距縣城三四十里均在鄠縣之西楊芳躡蹤追剿總兵汪
啟催調甯夏步隊一千名與楊芳合爲一路其已抵鄠縣
之西安馬隊四百名卽暫留於該縣防守以爲楊芳汪啟
等援應又節據各處拏獲賊探供稱該匪欲由郿縣斜峪
關竄入棧道至甘省兩當徽縣繞出漢南與臣前在洋縣
連次所得賊信相符是以臣卽帶重慶及潼關兵一千二
百餘名於初六日折回以顧西路初七日行抵褒城因沔

縣城守空虛當將所帶潼關兵二百名派令協守適豐紳
帶領省標及松潘兵一千五百名迎來會合當帶領前進
途次建昌新疆等營官兵二千名亦分三起先後趕來統
計現兵有四千數百名刻卽督同特清額豐紳唐文淑等
兼程探剿十三日已抵鳳縣隨探隨進賊若西來卽可迎
頭痛剿並顧竄甘之路至扎克塔爾楊遇春等帶兵五千
餘名現由洋縣華陽盤屋二郎廟探蹤進剿一得賊匪西
竄之信自卽躡蹤前來與臣兩面夾擊其呢瑪善所帶之
兵已由鄖西山陽一帶前來東路可資屏蔽總之東西南
北四路俱已有兵隨賊竄向何處俱可痛加剿洗斷不致

任其遊奕肆竄所有擒獲賊目王允吉並夥賊陳保太李才三名已飭令訊明卽行正法現在臣營又拏獲賊探唐貴山一名訊係隨同西江口兵丁起事賊匪亦經正法示衆所有賊營起事首逆臣節經研訊賊探據供首逆係陳達順陳先倫王倖其一同起事著名逆犯係王文龍蒲拜子田洪全陳才劉月盛康朝倖索貴吳老五劉興宋發元董貴孫發王天才林大武並另有與陳才同名一賊近又添有楊昇楊倖劉標羅姓歸姓等爲先鋒六七八人如王允吉等打旗賊目尙有十數人不能悉知姓名其苟文興在賊營近日亦稱先鋒常與陳達順蒲拜子等爲一路並稱

賊在大山岔時推蒲拜子卽蒲大芳爲大元帥諸賊皆聽
調遣等情統俟臨陣擒獲時訊明分別嚴辦再臣適接扎
勒杭阿來信並省城司道稟報扎勒杭阿於楊芳打仗後
親至軍營看視見楊芳左膀所帶矛傷雖已穿透尙未傷
筋著骨而胸前尙有剗傷三處幸不甚重尙可帶兵打仗
等語

諭曰德楞泰軍營現在豐紳所帶松潘鎮安及建昌新疆等處官
兵先後趕到統計已有兵四千數百名扎克塔爾楊遇春等亦
帶兵五千餘名合計已有萬餘兵力不爲不厚據德楞泰奏稱
東西南北四路俱已有兵隨賊竄向何處俱痛加剿洗等語賊

匪祇有一股不過二千餘人脅從居十分之六七兇悍者僅六七百人以如許兵力加以東三省勁旅有何難辦既稱官兵將賊匪四面圍住務卽乘此兵威勉力辦理一鼓殲除佇聽奏捷佳音切勿稍有延緩至此次賊匪由鄆縣之宋村杜家莊一帶直逼縣城南門攻撲經楊芳督率所帶新兵奮力擊剿斃賊數十人並生擒賊目王允吉一名及陳保太李才二名並割獲賊翎頂賊匪首級一顆賊鋒已挫可見新兵現在出力打仗德楞泰應將新兵加倍獎勵明白曉諭不但潛消其反側更可令其鼓舞效命於剿捕更易蒞事楊芳前因該管營兵滋生事端繼而又不趕緊追賊經德楞泰參奏業經降旨革去翎頂此次督

兵攻賊受有矛傷尚屬奮勉出力楊芳著加恩先賞還頂戴令其勉力剿賊以觀後效所有此次起事各首逆及有名賊目務須一律擒獲按律嚴辦毋任一名漏網此爲最要

二十二日

諭曰前據德楞泰奏新兵擊剿叛賊已挫兇鋒並稱各路官兵四面圍布隨賊所向俱可痛加剿洗等語看來德楞泰辦理已有把握現在又閱數日計接仗一二次即可全數掃蕩德楞泰惟應鼓勵將士奮勉圖剿務於十月內戡功竣事愈速愈妙不可稍有延緩爲最要至此次叛賊滋擾非如從前教匪分股四竄人數眾多者可比一經辦竣卽無須復議留防致滋糜費若接

仗獲勝後賊勢已就殘敗爲數無幾無需多兵勦辦所有徵調未到之兵如川省屯練等項俱可飛咨停止其已到之兵並應酌量遠近陸續遣撤至兵丁食糧入伍遇有緩急方賴以資捍衛乃此次叛賊並非地方文武激變竟以停止米折爲詞朕官肆擾實爲從來罕有之事且此等叛賊多係從前習教之徒經朕格外施仁從寬准其入伍今竟不知安分守法殊堪痛恨必須大加懲創以昭炯戒德楞泰務須將叛逆各犯按名擒獲無使一名漏網除在該處軍營分別凌遲正法外酌留二三名起意爲首要犯解京卽令帶兵勇健之員如富翰等酌派一二員押解護送來京候朕廷訊盡法處治以彰憲典德楞泰惟當趕

緊勦辦擒獲巨憝殄除餘孽用副委任承受厚恩勉之又勉仍將現在勦辦情形迅速奏聞以慰廑注

恭錄

御製詩

盼信二十韻

教匪已淨掃搜捕誠無遺三省漸復業相安太平時方幸永甯
謐耕鑿恢復基忽傳新兵譟揭竿亂又滋既戕所部長醜類咸
奔馳攻城兼掠寨百姓遭屠夷此輩原鄉勇入伍恩澤施負德
甘背叛勦滅義問宣

平定三省邪匪大功告成各路搜捕淨盡一切善後事宜次第經理地方悉就甯謐

前因陝省五郡廳爲南山扼要之區特設甯陝鎮增置官兵彈壓並於隨征鄉勇中請願入伍者一體招募作爲新兵俾得簡

稽資其生計且可藉以鈴束詎此輩桀黠難馴於本年七月初
藉停止加增米折銀兩爲由糾聚煽亂滋擾甯陝廳新舊二城
賊害護鎮參將楊之震都司羅全亮焚燒衙署肆行搶掠竄向
華陽二郎廟一帶經方維甸楊遇春帶兵入山勦辦嗣據探報
叛賊有由西江口攻擾漢中之信江口營新兵亦間有蠢動叛
賊復分股擾至洋縣踰城而上縣令曾彰泗罵賊被戕糾結幾
及二千人投至石泉被官兵擊退復折回甯陝鎮城東竄至鎮
安孝義因該處均有戒備未被擾害復由大山岔秦嶺一帶竄
出峪口希圖入棧滋擾此叛賊倡亂情形也逆匪等以入任新
兵膽敢負恩背叛實爲覆載所不容故不得不亟行殄滅矣

陝兵不可恃決機奚可遲爰命舊大帥西指重建旗勁旅遴百
騎赳赳皆虎羆別選甘涼隊更調蜀郡師雄兵已雲集一股賊
盡靡捷音久未至又吟盼信詩自慚乏德化盜賊接踵隨良民
始息役罹患增焦思方維甸楊遇春勦賊月餘尙無捷報爰特
命德楞泰率同扎克塔爾等前往督辦以
示威重陝省存營之兵新募者多雖不盡被賊煽惑究恐未足
深恃因思東三省勁旅素稱樞健所向成功適當八月木蘭行

圍之期吉林黑龍江兩處官兵前來熱河隨從進哨者計有四
十餘人盛京學圍官兵又得二十餘人卽馳諭德楞泰如果需
此項精兵卽速行奏請派往適德楞泰奏至與朕意相同卽令
溫春桑吉斯塔爾薛大烈等帶領巴圖魯侍衛官兵等三十餘
名並吉林官兵先行馳往出哨後又命富翰百順等帶領盛京
黑龍江兵繼往聲威壯盛並調集甘省河州固原等處官兵三
四千名川省建昌重慶等處官兵四千名屯土兵二千名楚豫
兩省亦各派兵數千名在邊境堵截似此各路大兵雲集諒不
難一鼓集事惟三省良民甫經安堵今又有封章何太緩西望
此番徵調而捷音尙未馳至殊增焦思耳

徒嗟咨轉瞬息冰雪凝凍虞乏疲亟願殄蜂螫肅靜終南陲人

事盡心力虔俟

上帝慈

德楞泰自到陝後雖頻有驛章奏報尙係布置一切情形

節經降旨飭催現在調集各處官兵俱已齊集東三省勁
旅亦可全抵軍營兵力較之賊衆多至數倍且近據德楞泰等
奏稱新兵勦賊亦能奮勉出力可見叛賊勾結無多雖與行次
及二千而眞賊不過數百祇須痛殲一二仗卽可殲事今雖五
冬之期已近所願速清么孽免致冰霜匝寒盼望北音昨青莫

釋惟冀

吳慈默佑俾關

西黎庶早獲安恬實深虔企

二十七日

公奏言查賊匪在盤屋郿縣一帶沿山奔竄有由寶雞益
門鎮西竄甘境之勢臣帶兵趕至寶雞渭河南岸星夜取
道兜剿適薛大烈溫春桑吉斯塔爾帶領巴圖魯侍衛勁
兵趕到會合卽由益門鎮一帶隨探隨進扼賊竄甘之路
該匪偵知西路有兵卽由郿縣斜峪關南竄桃川五里坡
一帶臣因扎克塔爾等一路官兵距賊更近當經飛飭近
頭截剿二十一日接據扎克塔爾楊遇春等稟報十八日
探知賊匪在塘口子好古堆一帶竄擾隨公同籌商扎克

塔爾同總兵田朝貴遊擊張啟鰲劉元明國琦等步隊官兵由盤汊河順梁前進楊遇春同總兵游棟雲副將祝廷彪遊擊永明等帶步隊官兵由小罐口沿山前進副都統蘇勒芳阿侍衛特依順保彥丕勒副參領吉勒彰阿佐領巴杭阿等帶領馬隊官兵由梅凹順溝前進分兵三路於四鼓發隊天明齊抵良玉地方遇馬步賊三千餘人蜂擁而來扎克塔爾等督率官兵奮力直撲槍箭齊發賊首僞元帥蒲拜子卽蒲大芳率眾首先衝來我兵直前搥殺刀矛並舉戳傷蒲拜子胸腰數處滾跌下馬旋被眾賊搶回登時殲斃賊匪數十人賊始敗退馬步官兵乘勢追壓三

十餘里直抵拐里該處地勢散漫該匪恃其人多又有後
夥伏賊接應四面分頭圍繞意圖抄截毫無畏怯我兵與
賊攪殺自辰至午衝壓數次又斃馬步賊匪五十餘人該
匪始向後山敗竄我兵追至山根賊匪分屯四山猶復抵
拒扎克塔爾楊遇春等遂於方柴關扼要暫紮視賊所向
再爲進剿此次打仗共計擊斃賊匪一百數十人帶傷之
賊三四百名生擒賊探僞先鋒彭貴等十二名夥賊四十
六名賊首蒲拜子僞先鋒任八後俱身受重傷僞總兵陶
姓受傷身死官兵內西安佐領巴杭阿左膝受傷河州千
總候補守備趙洪周腿被矛傷穿透又陣亡額外委石

從德一名此外間有傷亡者容查明分別咨部辦理訊據
僞先鋒彭貴供稱係西江口營兵前由鄉勇食糧此次甯
陝華陽鬧事之兵到西江口叫我們七八十人隨同前去
我就當了探馬頭屬陶總兵管轄賊營共有馬步隊三千
餘人蒲拜子一人總管大家俱聽他指揮前日原要走寶
雞由甘省秦州兩當竄往四川因探大兵已來卽從斜峪
關入山十七日到塘口子探得又有兵來蒲拜子等計議
要與官兵決一死戰好由棧道過四川去不料官兵利害
將我們殺傷甚多蒲元帥任元帥帶傷甚重我被官兵活
捉等情扎克塔爾等現將拏獲賊匪五十八名解至軍

營俟臣訊明分別辦理後另行具

奏此番痛剿賊匪實已大挫兇鋒據扎克塔爾等來信該匪被剿時有首逆在陣前跪稱情願投降者臣逆料賊情詭譎見大兵齊集欲圖藉此緩我兵力以便奔逃其言未可深信况該匪等罪大惡極實爲覆載所不容斷無寬恕之理自當乘此兵力將爲首各逆及曾經攻城焚掠之衆悉數殲除以示懲創而杜後患現在賊匪屯紮之處可通進口關安河一帶臣已督同各路官兵就近馳至方柴關一帶與扎克塔爾楊遇春等會合籌商分途兜截楊芳汪啟之兵亦已飭令會合一處趕緊圍剿呢瑪善之兵日內行

抵陝境臣已令迅速馳來會合其川省屯土官兵已分起
行過成都不日由甯羌入棧臣因桑吉斯塔爾帶慣土兵
管束調遣較爲得力已令馳往鳳縣留靖一帶齊集管領
將軍特清額現往倭什布一路會合自須添給兵力臣已
酌撥川兵交令帶往鳳縣一帶協同倭什布探勦萬一賊
匪由進口關等處西竄桑吉斯塔爾所帶土兵即可與倭
什布等約會合力堵截此時生力之兵厚集隨地緊蹙窮
追無論賊竄何處總不予以片刻之暇自卽立見窮蹙臣
仰蒙

聖主畀以軍旅重任叛匪早一日完結卽可早一日上慰

聖心臣亦可早一日回京斷不敢有意外耽延自甘嚴譴

諭曰此次賊匪由斜峪關南竄肆擾經扎克塔爾等一路官兵迎頭截殺殲斃賊匪一百數十人生擒偽先鋒彭貴及夥賊五十
八名並戮傷賊首蒲拜子及偽元帥任八後尚有偽總兵陶姓
受傷身死其餘帶傷之賊尚有數百看此光景賊勢竟無能爲
從前邪匪滋事時其兇悍首逆如高三馬五之類每與官兵接
仗均係在後觀望不輕肯易上前得利則進否則乘機竄逃詐
詭萬狀是以殲獲甚難今該首逆蒲拜子初次與官兵接仗卽
首先衝突我兵因得認明指戳刀子並舉傷其胸腰數處滾跌
下馬幾被擒獲其毫無伎倆可知設彼時有東三省官兵在陣

竟可將該逆殲斃今該逆雖幸獲延喘而氣已衰餒亦不難乘勢追擒德楞泰務當督飭各路將領視賊所向設法圍攻務期一鼓殲除不可懈緩試思此次接仗之時東三省官兵及川省屯練均尙未趕到而業已得有勝仗是緣營官兵亦能出力未始不可用以剿賊況現在東三省及川省屯練官兵又已次第齊集兵威愈壯剿此潰竄無能之賊又復何難德楞泰務須遵照昨旨趕緊辦理期於十月內一律肅事至此次官兵剿賊時據稱有首逆在陣前跪請乞降者德楞泰以其罪大惡極斷無寬恕之理所見甚是此次大兵專辦叛賊伊等身隸營伍敢於糾眾謀逆已犯不赦之條豈能再爲寬宥但賊營內現有三下

餘人未必全係叛逆或亦有沿途裹脅爲炊爨服役不得已而從賊者此等爲從之犯若未經抗拒官兵則尙有一線可原當此大兵雲集若已畏懼潛逃竟可置之不問儻臨陣乞降或殺賊自贖均可量爲寬貸德楞泰並當廣爲曉諭多設間諜卽將如此分別辦理之法宣播賊營旣使從賊之入早知去就且使真正賊匪聞之心生惶惑立時潰散庶蕺事更可迅速

恭錄

御製詩

陝信

背德甘爲亂潢池自合汙六師集秦嶺一戰刈衰蒲首逆應膏

鉞脅從可緩誅速祈滌殘孽

吳澤小陽敷

據德榜奏賊匪由郿縣斜峪關南竄桃川五里坡

於九月十八日兵分三路齊抵良玉地方適馬步賊三千餘人蜂擁而至偽元帥蒲拜子首先衝來我兵直前攪殺截傷該逆腰胸數處官兵乘勢追壓三十餘里復有後賊接應又經我兵衝壓數次該匪始向山後奔竄現在官兵扼要暫紮視賊所向再為進剿合計擊斃賊匪一百數十名帶傷之賊三四百名生擒賊探及夥賊五十餘名叛匪倡亂肆逆亟應迅速殄除今所調各兵初次接仗即將首逆蒲拜子截傷並殲戮匪黨多名其勢已挫因念賊中脅從者眾特諭德榜泰凡係斬兵作亂即窮蹙乞命亦在不赦若被裹民人為之炊爨服役者或臨陣乞降或殺賊自贖尚可量為寬貸並令德榜泰曉諭賊營廣為宣布於剿捕機宜更為有益此時東三省官兵已陸續到彼川省屯土兵亦已調集聲威愈壯自當一鼓殲除剋期肅事現已屆立冬之期惟冀 吳恩敷佑卽 奏蕩平共沐陽春 仁澤也

十月初四日

公奏言

臣

因賊匪敗竄之處可通安河進口關一帶入棧

之路甚多

臣

督同薛大烈豐紳溫春等趕抵方柴關與扎

克塔爾楊遇春等會合卽商令扎克塔爾楊遇春並楊芳

之兵共爲一路由兩河緊躡窮追

臣

同薛大烈等帶兵由

進口關遏截緊顧西北竄甘之路一面知會倭什布特清

額派兵於鳳縣圭崖寺一帶設伏扼賊入棧之路屯土官

兵已接續行至褒城留壩一帶

臣

卽令桑吉斯塔爾馳往

管帶扼賊西竄黑河之路兵分四路基布星羅賊探四出

偵知處處有兵不能遠竄卽在白蟒寺空觀子一帶屯聚

二十四日扎克塔爾楊遇春楊芳之兵趕到該匪尙欲拒

敵適臣前敵薛大烈豐紳溫春等帶領巴圖魯勁兵並四
川松潘等營官兵趕到該匪震懾軍威首逆蒲大芳王文
龍等率領多人至陣前拋棄兵仗環跪痛哭乞命惟首逆
陳達順陳先倫尙在後隊督催戰手迎敵薛大烈扎克塔
爾楊遇春等當以該匪窮蹙求饒斷難寬恕且後隊賊匪
尙在吶喊迎拒可見降順並非本心隨令施放槍礮弓箭
蒲大芳等大哭聲求情願自將首逆縛獻祇求暫緩進攻
扎克塔爾楊遇春等將計就計暫止槍礮蒲大芳等遂奔
回賊營約半日許果將陳達順陳先倫並幫同陳達順齊
隊之江口營賊首向貴一併捆縛送至大營蒲大芳王偉

王文龍劉月盛苟文興等大小賊目二十餘人一併同至大營哭求饒命並稱願將投順叛賊並隨同滋事游匪及裹脅百姓共計四千餘人分爲數處屯紮聽候查辦維時

臣後隊已到當經扎克塔爾薛大烈楊遇春面稟情形隨

訊據蒲大芳王文龍等供稱當日起事原係陳達順陳先倫二人主謀殺護鎮楊之震遊擊羅全亮亦伊二人喝令動手故不敢前來投降尚在齊隊抗拒我等當日祇係隨聲附和等情質之陳達順陳先倫供認不諱詰以在洋縣攻城殺官何人爲首陳達順直認不辭其兇狠之狀實堪切齒至向貴一犯訊明雖非兵丁實係江口游棍先糾約

叛匪羅玉等應賊自認攻城破寨抗拒官兵厯厯如繪此等起事首逆斷不可稍稽顯戮卽將該犯等綁赴營門轢割處死並安設護總兵楊之震署遊擊羅全亮署洋縣知縣曾彰泗牌位委官致祭以彰

國憲而慰忠魂仍傳首滋事各地方營縣俾百姓共爲洩忿快心各營汛新兵亦得知所警戒正在分別查辦間據楊芳馳來面稟有隨賊滋事遊匪並洋縣等處監犯及軍流等犯約計一千數百人於二十五日半夜拔營逃赴留壩江口一帶該鎮告請馳往截回賊首蒲大芳等跪求情願跟隨楊芳前去拏賊

臣

姑允所請爲以毒攻毒之計二十

六日楊芳挑帶新舊官兵並同蒲大芳等大小頭目二十餘人緊躡兜截扎克塔爾楊遇春薛大烈豐紳溫春接續馳往趕至江口該匪正欲起隊南竄當經楊芳官兵截住扎克塔爾楊遇春薛大烈等亦接踵而至於賊隊中訊出起意逃竄匪徒朱有貴李得吳大才唐倖周得五名當經用矛攢戳立斃夥匪等畏懼隨卽停紮扎克塔爾楊遇春薛大烈楊芳等以叛賊游匪皆蒲大芳等所帶游匪既有反覆則叛賊之投降亦難憑信當向蒲大芳等嚴加詰問蒲大芳等情願派出數人卽將叛賊遊匪及被裹難民分別造冊呈送核辦

臣

伏查賊首蒲大芳等因官兵四路圍

逼窮蹙乞降本當於陣前悉數剿洗但人數衆多恐玉石不分且該犯等既將起事首逆陳達順等獻出同楊芳將游匪等截回其情似尙可信此時叛賊及游匪等不下三千餘人旣據聲稱願降自應仰體

皇上好生之德不便概予誅戮卽蒲大芳等雖係首逆業已率衆乞降尙知悔罪亦似未便卽予駢誅轉致人生疑懼祇可俟大局辦定再爲請

旨分別懲創現在叛賊游匪等俱在江口一帶屯紮楊芳卽於該處帶領官兵彈壓臣督同扎克塔爾薛大烈楊遇春豐紳蘇勒芳阿並各鎮將厚集兵力在西河口一帶駐紮距賊

僅十餘里倭什布特清額帶官兵一千餘名移駐鳳縣三岔驛桑吉斯爾帶領土兵二千名駐紮留壩皆與賊屯相近俟該匪呈送冊籍到營臣體察情形隨機辦理受降如受敵總當萬分慎重斷不敢將就了事再扎克塔爾楊遇春等前在良玉地方臨陣生擒賊匪彭貴等五十八名臣當卽發交委員分別研訊內彭貴一名係西江口兵丁與先鋒羅玉一同起事充當探馬頭供認曾經攻城破寨卽凌遲處死又徐升楊順等三十八名訊明或當矛手或作賊探或隨同在洋縣城內焚掠俱屬法無可貸當卽正法其餘王興等十九名俱係百姓被賊裹脅當卽就近發文

寶雞縣分別給予路票資送回籍又洋縣稟報拏獲賊探
岳貴江口營參將張聯奎稟報拏獲賊匪唐升長安縣稟
報拏獲賊匪張明得俱經批令確訊罪無可寬亦卽正法
諭曰本日遞到德楞泰六百里奏報據稱官兵追剿賊匪於兩河
進口關及褒城留壩等處分爲四路碁布星羅該匪震懾軍威
賊首蒲大芳卽蒲拜子王文龍等率領多人至陣前拋棄兵仗
環跪痛哭乞命將陳達順陳先倫並幫陳達順齊隊之江口營
賊首向貴一併捆縛送至大營當經德楞泰訊明懲制處死蒲
大芳等復將匪徒內起意逃竄之朱有貴李得吳大才唐倬周
得五名用矛戳斃夥匪等畏懼停紮現在德楞泰督同將領官

兵就近駐劄隨機辦理等語陳達順身充甯陝新兵敢於糾約
匪徒倡謀叛逆攻城擄掠戕害官員肆意竄擾實屬罪不容誅
前因其裹脅漸多奔竄無定特派德楞泰統兵查辦德楞泰到
彼率領扎克塔爾溫春薛大烈及楊遇春楊芳等嚴密布置分
路進攻初次進仗卽大挫賊鋒茲復緊躡追勦該逆等畏懼軍
威痛哭乞降並將首逆陳達順陳先倫向貴等捆縛送出當經
臠割處死其在後拔營欲逃之一千餘人又經該犯等隨同楊
芳官兵前往截回將起意匪徒朱有貴等五名一併用矛戳斃
現在賊夥等四千餘人俱在江口一帶停紮聽候查核辦理實
爲迅速德楞泰著交部議敘並賞給黃辮大荷包一對小荷包

四箇以示優獎其隨同帶兵之扎克塔爾溫春薛大烈楊遇春
一併交部議敘並各賞給小荷包四箇至楊芳此次在前敵剿
賊亦屬出力本應一體議敘但前此於該管新兵未能妥爲彈
壓以致陳達順叛逆滋事其咎甚重是以將伊革去翎頂令其
帶罪立功嗣因其殺賊受傷尙爲勇往業經賞還頂戴並著賞
還花翎毋庸另給議敘

又

諭曰此時賊匪見大兵雲集四面環攻震懾軍威賊首蒲大芳王
文龍等率領多人在陣前環跪哭痛乞命將首先謀逆之陳達
順等三人捆縛送出其隨後逃赴留壩等處之賊匪一千餘名

又經該逆隨同官兵截回將賊夥四千餘人在彼屯紮聽候核辦看此情形其畏懼乞降情節自屬可信此時自無概予誅誅之理但此內有係曾經入伍食糧隨同叛逆及係地方游匪隨賊抗拒官兵並各處軍流人犯乘間脫逃及地方民人被其裹脅者情罪本自不同自當分別核辦此時賊匪甫經乞降正在疑懼之際轉不妨明白曉諭以爾等曾隸營伍輒敢隨同叛賊往來肆擾本罪在不赦但此時悔罪乞降不敢抗拒並將首逆陳達順等捆縛獻出尙有一線可原現已奏明皇上格外施恩賞爾一死但國法具在亦不能不治爾等之罪惟當將叛賊游匪及乘間脫逃之軍流人犯等詳晰造冊分別送呈靜候核辦

德楞泰於該賊匪等造冊到時詳加酌定將應得罪名仍俱按律問擬卽至輕者亦當定以遣戍一面將各犯照例監禁勿令聚在一處此爲最要一面繕摺奏聞候旨辦理此三千餘名內若實係被裹民人止在賊營服役炊爨並未抗拒官兵者德楞泰查訊明確卽著先行釋放回籍至此時大局甫定賊眾尙聚而未散所謂受降如受敵不可不倍加慎重卽如各處所調之兵其現在途次尙未到陝者自當先行撤回其餘到陝各兵亦當酌量道途遠近陸續遣撤其巴圖魯侍衛官兵及東三省勦旅此時旣無勦辦之事卽可交原帶之溫春等分起帶回不獨節省糜費亦可令其早就甯居此時善後應辦之事尙復不少

德楞泰自當在彼多住時日乘此兵威大加整頓務期事事完善永臻甯謐方可回京若草率了結恐滋流弊不可不悉心妥辦庶可一勞永逸現在叛賊乞降尙加恩宥其守法之新兵斷無復行查辦之理但此項新兵聚集一處終非妥局從前原議與各營陳兵分四六酌搭該省竟未能照此辦理致有今日之事茲正當軍聲大振之時或一面將新兵等加以鼓勵一面設法將伊等分隸各營使之散而不聚並須令各營陳兵數倍於新兵方足以資鈐制或將來於新疆兵丁應行換班之時是否可以酌量調遣之處亦密爲妥議德楞泰惟當不動聲色相機妥辦統俟善後辦竣大兵方可全撤

恭錄

御製詩

領侍衛內大臣繼勇侯德楞泰奏報剿辦賊匪事竣詩誌

欣慰

用兵宜速守

先言已隸營屯敢負恩

三省平定後辦理善後事宜已將鄉勇一項妥爲安頓其願入伍者分撥各營充額

食餉乃此項新兵之隸甯陝鎮者忽於七月初戕官滋擾負恩背叛該匪等性本桀猾糾結鴟張不得不厚集兵力大加懲創爰調派各路官兵及東三省勁旅共二萬有餘特命德楞泰率同扎克塔爾等前往督辦復命溫春桑吉斯塔爾薩大烈富倫百順等先後帶領巴圖魯侍衛官兵等馳赴會剿蓋兵貴神速昔年仰承聖訓指授韜鈴今茲決機制勝亦惟服膺弗失耳

二萬雄師方振旅三千小醜盡驚魂事成一鼓除元惡律按

餘氛翦蔓根不可勝誅投絕域止仁明罰治功原

德楞泰等帶兵到陝於初

次接仗時已大挫賊鋒連日盼望捷報甚切適於孟冬四日據德楞泰奏官兵追剿賊匪於兩河進口關及襄城留壩等處分爲四路基布星羅賊匪探知處處有兵不能遠竄卽在白蟒寺一帶屯聚九月二十四日扎克塔爾楊遇春楊芳帶兵趕到德楞泰前敵勁旅繼至逆匪震懾軍威賊首蒲大芳卽蒲拜子王文龍等率領多人至陣前拋棄兵仗環跪乞降其時首逆陳達順陳先倫尙在後隊抗拒官兵仍施放槍礮弓箭蒲大芳等遂請奔回賊營將陳達順陳先倫並江口營賊首向貴一併捆縛送至軍營蒲大芳王文龍王偉劉月盛苟文興及大小賊目二十餘人同至大營願將投順之叛賊游匪及裹脅百姓四千餘人分爲數處屯紮聽候查辦德楞泰當卽訊明起事主謀之首逆陳達順陳先倫並首先糾約之向貴等三犯割示衆正在查辦間有先經從賊之游匪千餘人於半夜拔營潛遁經楊芳馳往截回蒲大芳等亦懇求隨往復將起意逃竄之朱有貴李得吳大才唐倬周得五名用矛戳斃夥匪等畏懼停紮蒲大芳等現將叛賊游匪及被裹難民分別造冊呈送核辦德楞泰督同將領官兵就近駐營除業經釋放者計有三千餘人請旨遵辦此逆匪窮蹙乞命情形也逆匪等以入伍新兵膽敢糾衆倡

亂罪在不赦惟當大兵雲集蒲大芳等自知萬難逃竄願請貸命並將始禍兇渠擒縛就戮稍有一線可原因諭令德楞泰等於查辦時將被賊裹脅之良民先行省釋此內叛賊游匪曾經抗拒旋復歸順者仍按律分別定擬候旨遵行朕仰體上天好生之仁固不忍概行誅殛然國典具在必當按其情罪量予發遣此實法外施仁之至意也

初八日

諭曰前據德楞泰奏報賊匪環詭請降窮蹙乞命當經降旨令於造冊呈到時詳加酌核分別定擬奏聞候旨辦理並令方維甸帶同臬司素納馳往軍營與德楞泰會晤商酌今方維甸奏稱慮及賊匪乞降後設仍令歸原伍聚處南山恐留後患等語焉有此辦理之法試思該逆等罪不容誅於萬無可貸之中寬其一線生路已屬法外施仁若令歸入原營將焚燬兵房重為修

建不特糜費帑金且該逆等肆意劫掠之後仍得充補營兵無所懲誠必致日久復生反側成何事體方維甸所慮未免過當朕豈如此懦弱壞法養奸斷無此理斷無此事著傳旨申飭

十一日

公偕倭什布奏言竊

臣

倭什布聞賊匪等窮蹙乞降之信

隨即至德楞泰大營維時蒲大芳王文龍等隨同楊芳截回竄匪後復帶領大小賊目等前至

臣

德楞泰軍營環跪

求饒繼以痛哭

臣

等詳悉嚴訊據供陳達順陳先倫當日

起意主謀殺官破城情由眾口一詞與前奏供詞無異詰以蒲大芳既非主謀何以偽稱總元帥據王文龍等供稱

陳達順陳先倫性情暴戾武藝又好自起事以至洋縣破城石泉攻城皆伊二人主使王倬雖同他在一處因患病並未管事後來病好聽見老楊大人楊五大人俱帶兵來王倬王文龍蒲大芳就與陳達順陳先倫商量要想投出陳達順陳先倫不依我們見他行事太兇又不敢各自逃散就大家商議叫蒲大芳出來幫他做些主張以求生路蒲大芳就與陳達順等商量另立條規祇可掠食不可擅殺百姓擄掠婦女陳達順等也就依了到了孝義陳達順要由東川到商州河南去蒲大芳聽得德侯爺兵在西路與我們背地商議若出峪口沿山西去可以就近投營

明情節遂力勸陳達順等說峪口糧多可以掠食陳達順等拗不過眾人亦同行走到了鄆縣城下與官兵相近晚間陳先倫帶人撲營數次未能撲動到了天明蒲大芳等看見楊五大人遂哄陳先倫說後路又有大兵來了陳先倫率眾退走官兵追出傷了好些人後來到柴關遇見馬隊並四川官兵我們還抵拒了一回所以蒲大芳受傷旋見扎大人同老楊大人兵來並聽說德侯爺大兵也到我就陣前丟了器械哭求饒命陳達順陳先倫向貴三人尙在後隊催戰蒲大芳王文龍王倖劉順張坤戴興隆陳才劉月盛索貴董貴宋發元林大貴卽林大武劉興等就跑

回後營將陳達順陳先倫向貴三人哄到棚內捆縛獻出
的當日在甯陝時陳達順等原叫我們去算錢糧不料到
了當場陳達順先就動手我們在一處勢成騎虎祇得受
其脅制實不敢有意謀反若果有此意依著陳達順等由
商州到河南地方富庶又無大兵豈有不去轉向德侯爺
臨近的地方自尋死路麼祇求恩典等情至在江口截住
之一千數百人當經楊遇春督同楊芳逐一查點訊以逃
竄緣由據大眾僉稱我等俱係被脅百姓當日說大家投
降我等人人喜歡原就停住聽信二十五日晚間頭日朱
有貴李德吳大才唐倅周德五人到各棚傳令說他們雖

然降了我們還是各尋頭路不受拘束又可混喫喝我們
起初原不聽他他就將我們夥內一箇姓王的戳死我們
畏懼隨行逃到江口幸大人們趕來將朱有貴等殺死我
們就有命了祇求釋放等情楊遇春等因此起人數有一
千四五百名之多內陝省民人居其大半當卽逐名訊問
籍貫住址分別酌給路費遣令回籍其餘被脅難民除先
已遣回數百人外尙有一千六七百名連日亦俱次第遣
散統計前後資遣共有三千八百餘名收繳長矛三千五
百餘桿礮二位鳥槍三十餘桿其中雖不免有游手好閑
之徒與難民間雜但人數甚眾均以棄械來降不能立辨

良莠

臣

德楞泰派令營中員弁隨路分投巡緝如有在途

逗留滋事

臣

倭什布亦行知所在地方官嚴密稽查妥爲

安插此等脅從之衆散則易辦聚則難誅

臣

等惟有督飭

地方文武隨地隨時嚴密稽察以杜後患惟未經收集之時見有隨同叛賊之游匪難民及洋縣監犯各處軍流人犯二三百人拋棄軍械陸續逃散

臣

德楞泰現經飛飭地

方官分別嚴行查緝監犯軍流等均有姓名可稽自不難於弋獲其隨同滋事兵丁原共有三百九十九名除被官兵陣前擊傷並沿途逃亡事故外尙存二百四十四名俱經前來大營匍匐乞命情形極爲畏懼

臣

德楞泰委員隔

別研訊僉供當日總被陳達順陳先倫等哄誘被脅致罹重罪與蒲大芳等所供無異臣伏思兵丁叛逆爲我

朝百數十年從來未有之事本當悉數殲除卽窮蹙求生亦不必避殺降之戒但人數多至四五千名臨陣誅鋤旣不免玉石不分多殘生命而一經勦敗該匪熟悉路徑勢必竄入老林苟延殘喘冬令沍寒之際似不值以如許之兵受其牽制糜餉勞師且賊目蒲大芳王文龍等十數人究曾擒獻首逆陳達順等三人又復將逃竄游匪朱有貴等五人立時殺斃使餘衆不致他竄尙知悔罪求生與始終怙惡者稍爲有間臣德楞泰並查得蒲大芳王文龍等於

嘉慶二三年間卽在軍營隨同打仗亦曾著有微勞此時
爲陳達順等脅從聞臣兵到卽十分畏懼率衆投誠擒渠
自贖雖有從逆之迹尙無謀叛之心洵屬可信楊遇春楊
芳平時深得兵心連日體察衆情亦力保其斷無反側之
虞至所存兵丁二百二十四名內甯陝中營兵六十四名
左營兵十六名城守營兵九名東江口營兵十四名四畝
地營兵二十名華陽營兵四十七名留壩江口營兵五十
四名臣現據遴選該兵等向來畏服將弁分投管帶暫歸
原營約束操防該兵等人數無多分駐數處管帶將弁又
能得力自可相安臣於善後案內仍當酌量情形妥爲調

劑以期永臻甯輯除卽令扎克塔爾於本日馳驛回京詳
細面陳一切情形外所有善後事宜_臣等次第分別妥辦
諭曰甯陝叛賊滋事一案朕以賊匪既經窮蹙請命人數眾多自
斷無概予駢誅之理然其犯罪甚重亦豈能不分別懲辦因降
旨德楞泰令其於賊營造冊到時除實係裹脅難民先行釋放
外其餘從賊之犯仍當按律定擬分別監禁具奏請旨酌量核
辦乃本日忽據德楞泰倭什布奏到除查係被裹難民次第資
遣三千八百餘名之外有隨同叛賊之游匪難民及洋縣監犯
各處軍流人等二三百名於未經收集之時先行拋棄軍械陸
續逃散現已嚴行查緝至隨同滋事兵丁除被官兵擊傷並逃

亡事故外現存二百二十四名擬選將弁分投管帶暫歸原營
約束操防等語所辦錯謬已極賊匪罪犯不赦卽因其畏罪乞
降亦不過貰其一死已屬法外施恩豈有竟仍令各歸原營充
當兵丁之理該叛賊等本由鄉勇充當營兵自作不靖今因其
悔罪歸誠毫無罪譴不但該匪等罔知儆畏且與各營守分官
兵無所區別何以靖人心而肅軍紀從前剿辦三省邪匪彼時
賊匪數十萬人無不臨陣痛剿懾以軍威卽有棄械投出之人
經領兵大員等查訊實係被賊逼脅方免一死何嘗稍示姑息
邪匪等懾威畏法方能辦理淨盡次第戡功彼時德楞泰身在
行間甯不知之若彼時亦照德楞泰此次辦法一味懦弱壞法

養奸又安能令三省敕甯乎德楞泰上次奏報到時朕所降諭旨甚明白當候旨遵辦今率將叛賊歸伍其膽大專擅尤出情理之外本當從重懲治姑念其前在川陝等省帶兵勦賊曾著微功是以不加嚴譴德楞泰著退去御前侍衛領侍衛內大臣管理兵部事務管圍大臣將上次所給議敘撤回傳旨嚴行申飭交部議處此不過稍示薄懲若伊非勦辦教匪有功之人竟當立予罷斥至倭什布係本省總督卽伊自爲本管地方起見亦當計及萬全免貽後患乃並不詳慎熟籌輒行附和入奏實屬糊塗冒昧著交部議處伊人本無能且年老難勝總督之任著來京聽候部議所有陝甘總督員缺著全保調補該督接奉

此旨不必來京請訓著卽馳驛前赴新任

又

諭曰本日已明降諭旨將德楞泰等示以薄懲矣該逆等滋事已兩月有餘所蹂躪地方百姓受其荼毒官兵被害者若干人德楞泰並未將應如何撫卹之處奏及直將叛賊等遣歸原營並稱其充當鄉勇時尙有微勞足錄試思辦理庶務要在功罪分明有功必賞有罪亦必示罰若有功之人獲罪亦可置不論豈議功有典卽罪犯不赦竟可曲從寬貸乎看來此事竟係德楞泰一人主見而倭什布從而附和目前方維甸奏稱賊匪乞降後設仍令歸伍恐復留後患等語朕卽以斷無此辦法降旨將

該撫申飭今德楞泰竟如此奏辦在方維甸必係聞知軍營有此議論或竟係德楞泰於調集大兵時先行招降不獨許以免死並許其回營而方維甸不以爲然故密行具奏是方維甸日前所奏尙不爲無見何德楞泰昏憤糊塗一至於此乎殊不可解大負朕恩大損國體覽奏憤懣之至此事著仍交德楞泰會同方維甸妥爲辦理除褻脅民人及遊匪業經全數散遣外所有已回原營之叛賊二百二十四名應卽遵前旨傳到明告以恩免一死仍當分別擬罪候旨遵行若伊等不服拘喚卽當示以兵威立行誅戮若聞信潛逃亦當分兵搜捕拏獲時卽行正法現在各省官兵除停止撤回外其未撤之兵德楞泰務卽體

察情形暫行酌留俟遵旨將叛賊二百二十四名定罪發落其
問擬遣戍者械送出嘉峪關後再將兵丁全行撤回不可稍有
疎玩彼時德楞泰方可起程回京至各營未動新兵前有旨令
德楞泰等酌量移併此時且不必辦理惟當密飭該管鎮將嚴
明約束免致驚疑俟地方甯謐徐爲經理薛大烈現尙未起程
回京著留在德楞泰處幫辦一切至此次遣散民人酌給路費
回籍所辦亦屬錯謬此等資遣民人至三千八百餘名之多並
非盡係被裹難民其中游匪亦屬不少甚至有洋縣監犯及各
處軍流人犯在內卽眞係被脅民人其相距各原籍近或數十
里遠亦不過數百里祇當令其各自回籍何必給以路費若游

匪本係無賴之徒不繩之以法已屬寬典豈可更給以費用乎
此項資遣民人回籍實用過銀若干兩不准開銷公項著德楞
泰倭什布二人賠出歸款

尋

命補西安將軍部議請照溺職例革職奉

旨著加恩改爲革職留任八年無過方准開復

十三日

諭曰昨因德楞泰辦理甯陝叛賊一案將乞降叛賊二百二十四
名仍令歸原營充伍所辦錯謬之極已詳悉明示加以薄懲今
再四思維德楞泰辦理此事種種失當不可枚舉殊增憤懣從

來受降二字祇可施之外域誠以該國民人未隸版圖或自作不靖命將征討懾於兵威請命乞降方可俯允所請若內地亂民畏罪投出已不可謂之乞降况曾經充伍食糧尤當按軍法以示鈐制豈有業經謀叛仍得晏然無事者乎且卽以尋常刑律而論殺人者死卽有自首明條亦祇緩其立決仍問以斬絞入於情實秋審時亦必予勾所以重人命也今叛賊棄械投出亦祇可比之自首其應得罪名較之殺人罪名輕重懸絕卽以人命抵償相例彼一命一抵尙不輕赦况叛賊所殘害良民不知幾許並有該管官弁若干人卽將該逆等全行誅戮不足以償無辜被害之人何德楞泰全未見及此不但不將叛賊問擬

罪名轉令其歸伍食糧全無懲治此內有曾充鄉勇得有軍功頂戴者仍令其玷辱名器似此廢法不行國家綱紀安在乎德楞泰辦理軍務有年初不料其糊塗舛謬一至於此昨有旨令德楞泰俟叛賊問遣械送出嘉峪關再行撤兵回京今思叛賊二百餘名固須按名問擬而現在業已遣散民人其中游匪不少亦須設法安輯彈壓設此輩稍有滋事或應示以軍威之處仍當令德楞泰一手經理是以將德楞泰補放西安將軍以資鎮撫該將軍務當詳悉籌辦期於地方永臻甯謐稍贖辦理叛賊錯謬之咎

二十一日

公奏言竊照陝省軍務完竣所有前調川楚陝甘官兵應卽以次凱撤歸伍現均於初七八九初十十一二等日分路各回原營至臣同倭什布楊遇春現在暫留官兵四千二百名內川省重慶建昌兵一千名甘肅督標營河州兵一千名固原兵一千名陝西軍標兵一千二百名俟善後營制事宜辦有頭緒再行分起凱撤理合奏

聞再臣欽奉

諭旨令撫臣方維甸帶同臬司素納前來會辦善後事宜督臣倭什布俟方維甸起到後卽可回甘將督標河州兵一千名順帶歸伍

諭曰所稱現在暫留官兵四千二百名較之叛賊數已十倍有餘
德楞泰惟當會同方維甸遵照節降諭旨將叛賊二百二十四
名分別定擬妥爲辦理勿得再有疎玩至倭什布現已非陝甘
總督無事可辦卽前往科布多換班勿庸在陝逗留

二十七日

公奏言竊

臣

督剿叛賊辦理錯謬仰蒙

嚴旨訓飭實覺無地自容惟此起賊匪聚衆已至數千前此扎克
塔爾等帶兵至方柴關地方與賊接仗僅擊殺賊一百數
十名官兵亦有傷亡迨後隊伏賊趕至官兵復與鏖戰因
賊數衆多官兵四散扎克塔爾楊遇春帶領親隨數十人

拒敵賊衆將扎克塔爾等圍住正在危急之際適蒲大芳
王文龍等率衆趕至楊遇春馬前棄矛跪哭乞降經楊遇
春諭令如果誠心悔罪求生須將賊衆撤回並獻出首逆
再行定議蒲大芳等立將陳達順等三人縛獻並撤退賊
衆是以扎克塔爾等稟知臣德楞泰准令受降維時另有
一股賊匪千數百名內朱有貴首先不願投降執旗向江
口逃竄蒲大芳率衆跪求隨同楊芳截追將朱有貴等五
人扎死匪衆始行停紮臣因當時若不准其投降恐該匪
等分路逃竄以致冒昧辦理又此次四川川北之兵與甘
肅河州之兵一經賊匪衝突當即四散薛大烈溫存帶領

東三省馬隊在綠營官兵後行走距賊不遠一聞有伏賊
綠營官兵輒行驚奔山梁並朱力戰緣眾兵自軍營凱旋
未久尙未息肩均藉詞本身有應扣之項不能度日是以
與賊相遇俱不肯捨命向前卽有巴圖魯侍衛勁兵其勢
亦單總之兵不得力賊匪並非窮蹙乞降臣前此奏懇
聖恩網開一面並聲明俟大局辦定再爲請

旨分別懲創臣冒昧之見暫將各匪等交楊芳等帶歸原營約束
奏明於善後案內酌量辦理欲使該匪心無恐懼方可羈縻
惟初五日摺內未經詳悉聲敘祇令扎克塔爾回京面
奏實係臣昏憤糊塗惶恐敲棘之餘實覺無以自解茲奉

諭旨卽將該匪等傳到明白宣示分別酌定遣戍候

旨遵行但該匪等甫經分投歸伍行走安靜惟有長武營外委余貴餘丁周四於難民遣散之時中途搶奪散布謠言一經楊遇春拏獲稟報臣卽批令正法若將此外行走安靜之人一併拏解設或乘間奔逃卽以未撤兵力整隊進山又恐該匪等不服拘拏聞風竄擾臣再四籌酌並與薛大烈楊遇春等密商惟求

皇上暫寬時日卽日方維甸到營容臣等妥商辦有頭緒另行奏請

諭旨其餘遣散之人酌給路費一節計用過銀二千七百零二兩

奉

旨令^臣與倭什布分賠除倭什布應賠銀兩已在甘省藩庫自行

呈繳外所有^臣名下應賠銀一千三百五十一兩已寄信

^臣之子蘇崇阿具呈本旗在於^臣應得俸錢內扣繳歸款

諭曰本日遞到德楞泰覆奏接奉訓飭諭旨一招據稱賊匪已至數千方柴關一仗僅被官兵擊殺一百數十名賊匪實未窮蹙等語賊匪聚眾滋事或因官兵勦急無路逃生投降乞命此則情理所有今既稱實未十分窮蹙何以賊匪遽爾乞降顯係有挾而求德楞泰並不妥爲籌酌分別核辦輒將賊夥三千餘人資給遣散甚至將曾充兵丁之賊匪二百數十名歸入原營壞

法養奸莫此爲甚摺內稱將該匪等歸入原營約束奏明於善後案內酌量辦理等語似此二百二十餘名叛賊尙未令其入伍食糧若果如所奏則德楞泰之咎尙輕但據前摺內稱遴選將弁分投管帶暫歸原營約束操防夫操防乃營伍之事豈旣令操防猶非入伍食糧乎所奏亦屬自相矛盾現在全保方維甸均可先後到彼德楞泰惟當會同遵照節降諭旨將此二百二十四名叛賊分別定擬罪名具奏仍一面明晰曉諭以該匪等聚眾滋事攻城戕官本皆罪應凌遲法所不宥今因爾等投出乞命並擒獻賊首賁爾極刑免爾一死已屬格外恩施但應得罪名總當問擬奏明候旨爾等如稍不安靜卽當立寘典刑

使該逆等共知感畏若此內有聞風竄逸者卽應嚴拏務獲立予正法其或稍形驚驚竟有蠢動情形德楞泰等現有留防兵四千餘名卽當乘此兵力悉予殲除一名不留以示懲儆其餘散遣之三千餘賊夥並當飭知地方官隨時查察如再稍有滋事卽應拏獲正法不可再加姑息此事並非朕辦理從嚴恭查
乾隆五十九年

皇考高宗純皇帝實錄內載恭閱

聖祖仁皇帝實錄康熙年間有河南南陽鎮總兵高成標下兵丁因查拏賭博至知府署內爭鬧將知府沈淵擡至教場凌辱旋經將該兵丁等按律辦理之事因蒙

聖諭以各省營兵若該管官約束不嚴易於滋事通飭督撫提鎮等督飭營員隨時查察嚴行管束我

皇祖

皇考如此垂訓至朕何闕茸委靡至此朕實不甘試思兵丁爭鬧公署凌辱官長已屬罪在不赦今以曾隸營伍之人公然糾眾謀逆攻城戕官核其情罪輕重十倍貸其一死甯非逾格寬典何得竟置之不問耶著德楞泰全保方維甸悉心籌議妥議具奏毋得再有草率舛誤

又

諭曰扎克塔爾受

皇考及朕厚恩在御前侍衛行走多年洊擢至護軍統領此次派
勘甯陝叛賊事竣回京後詢及軍營受降情形扎克塔爾陳奏
登覆之詞多有不實不盡本日德楞泰將方柴關受降緣由詳
悉具奏復令軍機大臣將扎克塔爾傳至詢問陳出實情並據
稱前次召見時未經奏及顯係聞有德楞泰奏報始行據實直
陳其前次隱飾之咎實無可辭扎克塔爾著退出御前侍衛在
乾清門侍衛上行走仍交部嚴加議處至伊等帶兵剿辦叛賊
並未痛加殲戮僅以受降完結所有前次兵部議敘扎克塔爾
溫春薛大烈楊遇春給與軍功加級紀錄之處俱著註銷

十一月初五日

公偕方維甸奏言竊

臣

方維甸於十月二十一日行抵漢

中與

臣

德楞泰會晤敬繹節次

諭旨將現在降匪指示辦法

聖訓嚴明

臣

方維甸與

臣

德楞泰及薛大烈楊遇春再四商籌原

擬拘喚前來審明分別定擬惟查前次打仗兵不得力未能痛剿賊匪投降時實緣自生悔心並非勢已窮蹙兵既不足以制賊臣德楞泰竊恐日久蔓延難以戢事是以不得已允其所請今若再按名拘喚又致驚懼不安或生反側據薛大烈楊遇春僉稱降賊尙在疑慮刻刻自防辦理稍急必致激成事端臣等再四熟籌目下惟有仰懇

皇上天恩緩以時日再行相機徐爲辦理將善後事宜另行籌商
具奏方爲穩妥

臣德楞泰現蒙

恩補授西安將軍

臣

方維甸係本省巡撫楊遇春係本省提督皆

有地方之責斷不敢稍存大意自貽後患再蒲大芳等於
回營途次前經捕獲降後滋事之兵丁余大貴文貴二名
業經正法外近據華陽參將何占鼐稟報有帶回原營之
新兵等拏獲已散游匪在途中滋事之李相連張仕朝二
名亦經批令訊明嚴辦似此皆其悔懼自贖之處

臣等嗣

後總當察看情形借事懲辦以次消除庶衆心不致疑懼

諭曰據奏嗣後察看情形借事懲辦等語大不成話錯謬益甚試

思叛匪等既各懷疑慮此時若不卽辦理則受降已久卽應將
留存各兵全撤歸伍德楞泰方維甸係將軍巡撫亦各應回省
蒞任是已相安無事何能遲之又久忽復將此二百二十餘人
問擬罪名若德楞泰等仍駐該處留兵防守則該匪並形疑懼
尤難保其不別生事端德楞泰全保方維甸仍當遵照前旨會
同籌商將乞降之蒲大芳王文龍等及其餘叛匪或調集到營
或帶兵分赴各營明白宣諭卽該匪等或有抗拒情事朕亦不
責以激變之罪至德楞泰辦理此事始則征調多兵繼又頓兵
不進乃前月兩次摺內猶稱該匪等震攝軍威窮蹙乞降竟全
係飾詞誑奏本卽應褫職治罪姑念前次勦辦教匪歷著勞績

特從寬宥卽楊遇春楊芳等縱賊招降亦有應得之咎今因帶兵乏人暫免究治若能及早妥辦立功自贖尙當酌量加恩

十四日

公偕方維甸奏言

臣等前奉

諭旨從前甯陝各營陳兵與新兵分四六配搭該省竟未照辦致有今日之事茲當軍威大振之時當將新兵分隸各營令陳兵數倍於新兵以資鈐束或新疆兵丁應行換班之時是否可以酌量調遣密爲妥議又續奉

諭旨甯陝新兵竟敢相率謀叛不惟所遣名糧無庸添募並可將營汛酌行裁撤若仍須安設營汛或竟全數移駐陳兵以資防

守等因欽此仰見

聖訓精詳計深慮遠

臣

等實深欽服之至伏查甯陝鎮屬各標營

原設兵六千八十名多係鄉勇入伍及招募山內客民充
補此次滋事者不過數百人餘皆安分守法且有隨同出
征者若將此等新兵分隸各營另換陳兵入山不特區分
形迹新兵或致驚疑抑且陳兵安土重遷勢難移撥惟有
欽遵

諭旨裁減兵額歸併營汛密爲規畫庶可以漸分其勢
大烈楊遇春悉心熟籌擬於甯陝屬之中左右城守並東
江口華陽斜峪關七營內裁減兵丁一千五百名先儘

現在缺額之數裁去此後馬步缺出應以守兵遞拔所遺守兵卽行停募逐漸裁減其甯陝西路之西江口營併入留壩營仍逐漸裁減兵四百名祇留六百名該處與提廂之漢中協漢鳳營相連應改歸固原提督管轄甯陝東路之孝義營兵四百八十名毋庸裁減該處與陝安鎮屬之鎮安營相連應歸陝安鎮管轄共計裁減兵額約二千名又改歸提督陝安鎮管轄一千八十名甯陝所存額兵不過三千餘名庶人數漸少易於約束稽查且將留壩孝義等營改歸他標使新陳相間藉資鈐制將來裁減至此次所定額數應否再行酌減之處屆期察看情形另行具

奏現在甯陝兵額旣擬裁減所有分出營汛亦應酌量歸併
除夾嶺洵陽壩茅坪厚畛子方柴關大山岔等處分汛均
係往來要路仍擬酌留外其餘分汛兵丁撤回本營各汛
兵房卽可毋庸修理以節糜費又查漢中協新陳兵額除
分出各汛外祇有存城兵五百四十名陝安鎮城新陳兵
額除分出各汛外祇有存城兵一千三百名漢中興安兩
府自連年用兵以來五方雜處人煙湊集不敷彈壓應將
銅廠新兵原額內移歸漢中府城三百名曾家壩等分汛
新兵移歸陝安鎮城三四百名祇移兵缺不移新兵嗣後
遇有該營汛新兵缺出毋庸在原營募補另於漢中興安

府城招募土著居民充伍如此辦理不惟新兵漸少且係土著居民在本處食糧城內兵房亦毋庸另行添建再新疆屯防兵丁五年一換例於陝甘各營官兵內派往陝安漢中陳兵卽有換防之例惟甯陝新營及陝安漢中新兵未經議及茲蒙

聖明指示具仰

睿照無遺自當遵

旨俟換防屆期卽勻出陝甘各營換防額數於甯陝各營及陝安漢中新兵內擇其無家室者派出前往新疆各城換班以分其勢每換一班往來約須五六年與陳兵駐防日久更

可使驚驚之氣漸馴其換防營兵數目以及一切章程容俟全保到時再會同詳酌分款開單續行陳

奏

諭曰甯陝鎮屬各營新兵從前盡係招募鄉勇客民以致此次有叛匪糾眾滋事之案現在地方甯謐自應酌量裁減今據奏將各營逐漸裁撤又改歸提督陝安鎮管轄兵一千八十名外甯陝額兵不過三千餘名易於約束稽查至新疆換防一節陝安漢中陳兵本有換防之例此次新兵自應一律派往但必須兼用陳兵使之形迹胥忘自可相安無事驚驚漸消德楞泰統俟全保到被會商妥辦然此皆係善後事宜而於降賊二百二十

四名如何辦理並未提及此係目前最要之前因方維甸奏
德楞泰近日痰多氣喘且覺言語精神關照不能周到朕慮德
楞泰或因憂懼成疾殊深懸厪今摺內並未敘及患病一語看
來德楞泰近日自漸向愈著仍遵照節次諭旨悉心會籌妥辦
如果完善藏事尚可稍贖前愆也

案先是方維甸奉

諭令將公辦理降匪或有何人

從惠曾否有阻止之人堅執不從嗣經屢次譴責有無怨
望情事均密查據實具奏會覆稱方柴關交戰之時賊意
謂官兵未勝方肯受降若再縛獻渠魁更可將功折罪是
以勢未窮蹙哀懇愈堅而此次調來官兵性情驚駭不聽
約束打仗各存觀望無人出力故扎克塔爾等九人商准
投誠並欲將此二百二十四名全歸甯陝鎮城不行分散
稟請代奏經公駁飭始令各回原伍並非專擅自用
亦並無先往招降預許歸伍情事且稱公屢奉飭責之
旨惟深愧懼近日以來痰多氣喘時覺言語精神關

照不能周到接見文武各員祇云後悔無及
未聞怨望之語故本日

諭旨及之

二十九日

公偕全保方維甸奏言竊

臣

全保方維甸前擬將甯陝各

營新兵降匪一體換防於中途鎖拏定擬一事奏明俟楊

芳來到漢中商定辦理日內楊芳到來

臣

德楞泰會同詳

細詢問據稱各新兵多願換防現在歸伍降匪等聞在營
之兵業已派出並無疑慮且有告請前往者

臣

等以該匪

既不生疑正可乘此卽行辦理是以楊遇春楊芳商定於

甯陝中營左營華陽等三營各派兵八十名留壩江口營

派兵一百名甯陝右營城守營東江口營留壩城守營四

營各派兵四十名孝義斜峪關二營各派兵二十名以上甯陝十營共派屯防兵五百四十名所有歸伍降匪二百餘人俱在數內不願換防者不過數名其中亦有賊目但人數無多儘可設法辦理其新兵中平日猜驚者亦卽密行查出於此次派往楊芳卽日回鎮趕緊辦理至漢中沔縣鋼廠三營告請換防新兵內已派出一百二十名仍照漢中換防舊例由略陽白馬關一路行走並令留壩城守江口兩當及華陽營兵丁由鳳縣兩當一路行走令甯陝鎮標東江口孝義斜峪等營兵丁出山由西安乾州及汧隴大路行走於此三路內再分三四十名爲一起間日起

程各派換防弁員帶往另派參將張聯奎遊擊柯藩楊雲
霄三員各赴一路彈壓仍令總兵楊芳在後統領管束俱
送至嘉峪關外毋庸另行帶兵護送凡係降匪中著名頭
目俱歸末起令楊芳親自管帶起程俟各起陸續起程
全保_臣方維甸卽行趕赴前途會晤楊芳將該賊首賊目
等按名鎖拏監禁_臣德楞泰仍在漢中與楊遇春暫駐一
面將不願換防之降匪賊目設法拏禁_臣等卽一併按例
分別定擬具

奏恭候

諭旨遵行再應行發遣之犯現俱借換防爲名令與實往換防兵

丁一同行走所有定例應領行裝車價口糧等項不得不
一體給予以免疑慮除實在換防新兵所領銀兩照例請
銷外其給與匪犯各項銀兩自應臣等三人分賠歸款

諭曰本日伊等摺內據稱擬將換防兵丁分三路行走全保等趕
赴前途將賊首賊目等按名鎖拏監禁等語伊等撥摺時尚未
接奉前旨故有此議辦理實屬未協不獨無以服降匪之心卽
同往新兵亦覺號令不足憑信此等智取術馭之爲殊屬不值
德楞泰等惟當遵照前降諭旨將此等降匪隨同各兵到配明
宣諭旨並知會新疆大臣著令永作戍兵不准換回將來在該
處亦不得再有陞擢以示懲創如稍不安分在彼滋事卽當從

重辦理一切悉遵指示機宜不必再行權詐至摺內所稱甯陝
十營共派防兵五百四十名其所有歸伍降匪二百餘人俱在
數內不願換防者不過數名其中亦有賊目人數無多儘可設
法辦理等語所奏又涉含混降匪內不願換防者究有幾名其
所謂賊目者係何姓名是否卽係蒲大芳王文龍抑此外另有
何人何以摺內不詳細聲敘降匪本祇二百二十四名今情願
換防者既有二百餘名則此外不願換防者至多僅不過十餘
名人數有限伊等於派令換防之時不思踴躍前行輒敢聲稱
不願卽係違抗詔旨其罪無可再追此時卽當按名嚴拏照例
從重懲治何須另行設法豈此十數名降匪尙不能立置之於

法乎此次賊匪不過二百二十四人爲何畏之如虎太覺懦怯之極殊不可解又如摺內所稱除實在換防新兵所領銀兩照例請銷外其給與匪犯各項銀兩請分賠歸款等語殊不成事此時旣將該降匪等作爲換防兵丁其沿途應得口糧及到戍後應得分例自均應一體賞給前降諭旨甚明又何必伊等賠出况全保甫莅陝省尤可不必總之此事辦理錯謬於前此時不得已如此區處朕實爲保護良民究非正辦今成事姑置勿論惟目前善後事宜關係更屬緊要本日薛大烈到京據稱現在營伍廢弛官兵不能用命如方柴關兵潰一事蘇勒芳阿游棟雲田朝貴所帶領陝西固原河州西安滿營以及四川川北

官兵均一見賊匪紛紛逃散無復紀律推原其故皆係新募之兵未經操練又該兵丁等自元年出兵以來均有節年借支各款每兵一名自一二十兩至數十兩不等凱撤之後按季分扣未免拮据遇有名糧缺出因扣項數多人皆不願入伍所募補者盡係無籍貧人希圖餬口平日均不能差操有名無實又兵丁所用器械不全多不如式馬乾銀數不敷兵丁不能喂養等語用兵全在紀律該將弁等平日不認真操練以致臨敵退逃緩急難恃武備如此可爲寒心所有方柴關各兵潰散一事斷不可不查辦示儆卽法不及衆亦當查出首先逃散之人按律處治如有官弁在內尤當嚴拏辦理不可再存姑息之見其領

兵各員不能約束嚴明亦當據實參辦至兵丁等因扣項較多情形支絀其新募頂補者率皆無藉之徒毫無實際是募一兵不得一兵之效設有調遣又焉能克敵致果此事前亦據德楞泰等奏及曾經飭令詳查著卽迅速查明各該處兵丁現在應扣俸餉究有幾何是何款項所有例內借支及例外借支者一逐細聲明聽候核辦其中例應攤扣者朕當酌量施恩若本係例外借支不能開銷在於各兵名下攤扣是卽不應扣而扣或竟有糧員等私自花用在於兵丁名下扣還者此等款項皆當查明經手之員責令分賠歸款並著據實參奏又何得任意剋扣使兵丁人人苦累乎至於官兵所用器械因何短缺又不

合式亦著據實查明設法整頓其所云馬兵不能自行喂養以致賠累一節薛大烈請令官兵朋槽喂養是否可行均著德楞泰全保方維甸三人詳悉妥商歸於善後案內奏開辦理再甯陝設營一節茲據薛大烈奏稱山內兵丁素不能操練得用兼且不守營規往往騷擾客民不但無益而且有損等語甯陝增添新兵已經數年不能諸練營規任其縱恣如此實不成事聞楊芳平日疏於管束亦應參奏懲處至新營竟當裁撤爲是現在降匪二百二十四名自當開除糧缺不必募補卽此外換班新疆者將來班滿後亦儘可派歸別營至其餘未換班各兵應如何裁缺歸併之處務當詳悉辦理從前添設甯陝鎮一事原

卷之三十一
三
係額爾登保奏辦並非德楞泰主見此時伊亦無所迴護惟當與全保方維甸悉心籌辦期於地方永遠甯謐勉圖後效

十二月初三日

諭曰昨因方柴關兵丁潰逃一案大千軍紀降旨將提督楊遇春總兵楊芳游棟雲一併解任交德楞泰等查明參辦但就伊三人情罪比較亦有重輕當分別覈議楊芳本係甯陝鎮總兵平日沽名釣譽馭兵過寬以致養成鴛鴦糾眾倡亂其罪較重且署理固原提督所有固原河州潰散之兵皆其管轄不嚴選派不精所致此時自應嚴參治罪伊從前在軍營稍有微勞尙不致終於擯棄現在甯陝新兵前赴新疆換防或卽責令楊芳管

帶前往俟到彼謫戍數年效力贖罪如果自知愧奮再行酌量
施恩至楊遇春係固原提督兼轄甯陝自有應得之咎但伊自
補授固原提督之後常在軍營並未到任卽回籍補行穿孝所
有甯陝叛案非伊任內之事卽檄調固原征兵亦非該提督簡
派念其勦辦邪匪曾著勞績且於該處情形熟悉尙可量從寬
貸該提督現已解任將來仍可降補總兵留於陝甘兩省著德
楞泰等酌看情形如此時甯陝鎮總兵一缺未可遽行裁撤卽
著將楊遇春補授資其撫馭如此時卽應裁撤俟有他鎮總兵
再將該員補用至甯陝裁鎮一事必須慎重現在該處額兵尙
多若一時裁汰名糧恐該兵丁等失其職業又致滋生事端德

楞泰全保方維甸當悉心籌畫不動聲色逐漸辦理不可冒昧
輕率其河州鎮總兵游棟雲於管帶本鎮之兵不能約束致有
潰散並著德楞泰同解任副都統蘇勒芳阿一併參奏懲治以
示儆戒至薛大烈現已補授固原提督令其馳驛前往如伊到
陝後新疆換防一事尙未辦竣著德楞泰等會同薛大烈妥辦
如業已辦竣飭令前赴新任

初十日

公偕全保方維甸奏言竊_臣等前將漢中沔縣銅廠西江
口留壩兵丁分起分路情形具奏後連日鳳縣略陽兩縣
稟報各起兵丁分路行走中途甚爲安靜陸續已出陝境

又據總兵楊芳報稱甯陝中左右城守四營東江口孝義二營共挑派換防兵丁三百名降匪等踴躍告請前往者甚力現分十二起頭起已於十二月初一日起程所有此次派往換防兵丁均不令攜帶軍器俟至屯防處所卽將舊班兵丁軍械留用途中更易防範例需鍋帳於出口時再由肅州配給其應給行裝分例銀兩業已按例支給沿途車價口糧均已支領裹帶至蘭州省城再由該處照給前進以省沿途供給之煩現在辦理情形甚爲妥順山內百姓等皆不知臣等密商辦法惟傳言降匪悉往新疆得除後患俱各安心樂業昨臣全保方維甸又欽奉十一月

二十四日

恩諭仰見

皇上措正施行不欲與此等愚頑智取術馭權衡輕重

大公至正跪誦之下欽服難名臣等當於換防兵丁全數起程後

體察情形儻有有心抗違諭遣不行之人卽行奏明遵

旨嚴辦臣等現將辦理情形隨時寄知勒保查照至遣散之難民

游匪三千八百餘名尙有先期逃散者該游匪等籍隸川

省者將及千名其餘寄居山內者最多臣德楞泰前於散

遣後分派妥幹員弁四路巡查兩月以來尙無聚集逗留

情事據四川總兵田朝貴副將羅思舉等稟報川省邊界

亦無游匪滋事

臣

全保方維甸到漢中復委令地方文武

各於本境嚴查並無匪徒聚集搶掠情事惟華陽營參將
何占鰲稟獲匪徒楊滿王才二名解送前來臣等訊明均
曾從賊搶掠且於乞降時不候散遣先行逃散者卽子正
法又有甯陝歸伍降匪雷貴於歸營後酗酒頂撞本營汛
弁亦經楊芳稟明正法現在山內兵民均各相安匪徒斂
戢地方邊界均甚甯謐又查洋縣等處安置流犯張大陳
三二名先行投回應照例援減其餘流犯劉乾等三名直
至賊匪投誠後始行投回與賊匪滋擾時先行投出者自
閒應毋庸援減至未回軍流徒各犯除洋縣軍犯項培徒

犯馬志雲二名據報被賊匪戕害外未獲者祇有洋縣流
犯曹起雷等三名並無多人現飭將該三犯與洋縣未回
監犯孟大貴等八名及已回復逃之袁開鳳一名一併嚴
飭通緝務獲究辦

諭曰德楞泰等奏甯陝換防兵丁分路行走甚爲安靜陸續已出
陝境等語現在辦理降匪換防一事甚爲妥順但摺內所敘尙
未明晰此次降匪二百二十四人除雷貴一犯以酗酒滋事正
法外尙有二百二十三名如何分起行走是否人人願往換防
前奏稱不願換防者實有幾人其中賊目係何姓名仍未詳晰
聲明德楞泰等接奉此旨卽將降匪二百二十三名是否全數

前赴換防其抗違不行者共若干人係何姓名並造具清冊詳載每起降匪計有若干人開具姓名及某起派赴何城換防一登記總須將降匪等按名指實確有著落由五百里具奏以便諭知新疆各該處大臣遵照不可稍涉含糊至辦理換防事宜已竣所有前在方柴關打仗臨陣逃散各兵務須體訪明確分別懲治以肅營制俟此事辦竣再將甯陝額兵如何歸併各營之處妥籌經理以期地方永臻甯靖

十七日

公偕全保方維甸奏言連日據報甯陝頭二三四起兵丁已接續間日起程出山並據長安咸甯兩縣稟報頭起兵

丁於初五日過省西去行走甚爲安靜其陝安鎮換防新兵一百八十名頭二起已於初一初三等日過漢中取道略陽入甘俟陝安鎮兵丁過竣固原換防新兵一百二十名亦可接續起程約至本月二十日前後各營兵丁均可全數就道臣等前奏換防地方係回疆十城今查明回疆防兵多有未屆班滿者惟喀什噶爾烏什阿克蘇三處防兵係嘉慶十二年六七八等月班滿又塔爾巴哈臺防兵亦係十二年七月班滿共計班滿兵一千餘名卽將此次派出兵丁九百餘名分派該四處換防臣等統俟各營兵冊到齊時查照派赴各城細數開列名單恭呈

御覽至刻下善後事宜惟裁減甯陝兵額一事最關緊要臣等連日悉心熟籌若將該鎮兵額一時全裁此等無業之人恐其無以資生流而爲匪自應酌量歸併陸續裁減臣等現在將善後各條逐一定議再行奏請

訓示

諭曰據稱甯陝各起換防兵丁行走甚爲安靜計本月二十日前後均可全數就道等語看來降匪等尙屬安分守法至新疆防兵多有未屆班滿者惟喀什噶爾烏什阿克蘇塔爾巴哈臺四處正屆班滿此次派出兵丁卽分派該四處換防計降匪二百二十餘名每城祇分駐數十名尙易管束總楞奏候各營兵冊

送齊時卽遵照前旨詳細造冊速奏其裁減甯陝兵額一事據稱酌量歸併陸續裁減所見甚是至甯陝鎮總兵一缺尙未議裁楊遇春於南山情形素爲熟習且得兵心雖曾任固原提督未經到任此次標兵潰散並非伊平素不能訓練所致現據奏稱方柴關打仗時楊遇春派出綠營馬隊親隨官兵十餘人在第四橫岡之北近山前進可見伊所帶弁兵猶能前進禦賊尙無不合惟於德楞泰受降一節未經阻止又不據實具奏咎止於此楊遇春著補授甯陝鎮總兵並令卽行接印任事毋庸再行詢問

二十日

公偕全保方維甸奏言臣前經奏令楊芳護送換防各兵至嘉峪關外嗣因奉有楊芳解任之

旨又奏明令總兵吳廷剛等迎來接護以便換楊芳速回旋奉訓諭以新兵派赴新疆換防或令楊芳帶領前往效力贖罪

聖諭周詳實屬至當不易查方柴關打仗時楊芳未到無可質訊之事伊現在押送換防新兵降匪等應卽令徑赴新疆查楊芳平日馭兵過寬養癰貽患且曾署理固原提督於固原河州兵丁管轄不嚴選派不精誠如

聖諭其罪較重相應據實參奏請

旨將楊芳革職發往新疆效力贖罪現將甯陝中營城守營兵丁

擬派至塔爾巴哈臺屯駐應卽令楊芳在該處效力稍圖
自贖至此時甯陝兵丁分起出山之後該處人心甫定極
須加以鎮撫又從前散去之地方游棍等設有酗酒賭博
滋事之案皆應隨時嚴懲日來有楊遇春在彼巡查諸臻
安妥堪以仰慰

聖懷

諭曰楊芳聞係營伍字識出身淳膺恩擢卽衝鋒打仗亦非所長
乃身爲專閫大員平日馭兵不能嚴明訓練一味姑息以博寬
厚之名致令兵丁不知軍紀驚駭者糾衆倡亂怯懦者臨陣潰
逃其咎實難寬宥德楞泰等議將楊芳革職遣戍自應如此辦

理至派令帶領中營城守營兵丁前赴塔爾巴哈臺一節亦可
不必兵丁等沿途行走本省原派員弁管帶無須楊芳管束况
伊似此寬柔又焉能管束兵丁耶楊芳著革職發往伊犁交松
筠派令效力贖罪至楊遇春戰功較著前已降旨將伊降補甯
陝鎮總兵嗣後惟當責令妥爲管轄務使營務日就整肅勿再
懈弛干咎

同日公偕全保方維甸又奏言竊_臣等將甯陝營制事宜
公同商酌僅分列十二條恭呈

御覽一甯陝鎮屬營分請歸提鎮分轄一甯陝鎮兵額請陸續裁
減一南山內分汛請分別酌留移併一陝安鎮各營汛兵

請酌量移併一漢中協存城兵丁無多請裁去鋼廠新營
兵數於府城添募一陽平關略陽二營請將現裁各營守
備移駐經理糧餉一提屬漢中協及漢鳳陽平沔縣甯羌
等營米折銀兩請照額爾登保原議均給四錢與兩鎮兵
丁米折畫一支給一原議營地支糧章程請就現在兵數
情形量爲調劑一甯陝陝安漢中各營新置營地請一體
招佃收租一衙署兵房堡城請量加添修毋庸全行建蓋
一改移營員請換給印信一山內各營缺請酌量改爲題
補奏入得

旨軍機大臣會同兵部議奏尋覆議行

二十三日

公偕全保方維甸奏言竊

臣等欽奉

諭旨官兵所用器械因何短缺又不合式著據實查明整頓等因查綠營兵丁器械定制以鳥槍弓箭爲主刀矛藤牌各項雜技不過十分之一平日操演專試槍箭並不練習長矛緣數年來征剿教匪遇山深箐密相近攪殺之時槍箭難施用矛較爲便利積習相沿所用器械長矛轉多於槍箭實與舊制不合且因抵禦賊矛竟有長至二丈有餘以便在遠擊刺者臣等公同酌議應令陝甘各標營於弓箭兵內酌挑十分之二兼令習矛惟不可因操練矛法轉致生

疏弓箭

諭曰營伍軍器以弓箭鳥槍爲重必當操演精熟以昭武備至長矛一項祇係挑刀藤牌等雜技中之一前因河北鎮總兵蔡鼎奏請於弓馬兵丁內酌派十分之二兼習長矛曾諭令各省營制酌定額兵演習因思長矛究非營伍緊要技藝兵丁於習練弓箭鳥槍外兼習其技以資擊刺原無不可若因演習長矛於弓箭鳥槍轉致生疎殊屬輕重失宜非所以飭戎器而講武藝也且矛桿過長於運用不靈尤不足以資刺擊若云深林密箐用矛較爲便利則無此理嗣後各省營制訓練卒伍總當以操練弓箭鳥槍爲正技長矛祇可令其兼習並著於額兵內祇酌

定十分之一不許過額製造矛桿不得過一丈如有違式製用者經該管大員查出卽嚴行懲治並將該將領一併參處

同日公偕全保方維甸又奏言竊_臣等業將營制各款恭摺奏請

聖鑒所有應辦善後事宜亦經會同悉心籌議謹分列七條恭呈御覽一賭博匪徒應嚴懲辦一山內遊匪應行照保甲之法責令清查一甯陝留壩二廳城垣坍塌殘毀應請勘明另建洋縣一城應就舊治重修此三廳縣土性不堅並請改建甌城以重永久一漢中城固鎮安各城多有坍塌應行修葺一山內寨堡軍糧除借支外尙有未經動用者應查明被

賊蹂躪之甯陝等十三廳縣貧民酌加撫卹一南山山內甯陝等四廳二縣請改照邊俸之例以專責成一陝安兵備道應請照例節制營員以符體制

諭曰本日德楞泰等奏籌議善後事宜一摺已交該部議奏矣朕詳閱原奏內有請修建坍塌殘毀各城垣一條甯陝一廳因有鎮兵屯劄爲南山扼要之區是以築城守禦現在賊匪滋事之後方將鎮兵裁減此時存兵之數較少將來或全行裁撤亦未可定又何必將城垣另行興建卽謂該處及留壩洋縣二城均須衛護居民不能聽其坍塌則酌建土城已可何必改建甯城致滋糜費究竟是否必須甯城俟覆奏到日再行核奏

案吏部等部尋覆稱善後事宜七條除甯陝等處改建甄城現今覆查其餘六條均應如所請辦理

上從之

二十七日

公偕全保方維甸奏言現在各營新兵及甯陝降匪楊芳管押未起已於十二月二十日出山前往新疆先經_臣等飭令各營開具年貌籍貫稟報滋據陸續報齊_臣等逐名查對歸伍降匪實係二百二十六名計比原數多二名此內現在前赴新疆永遠遣戍者蒲大芳王文龍等一百九十五名其餘余大貴雷貴二名因酗酒滋事業經

奏明正法尙有不願換防意存觀望之賊目苟文興林大貴吳成友卽吳老五董貴四名推病賊目羅玉一名現在楊

遇春鎖拏解送並有歸伍後脫逃之曹朝選一名亦經楊
遇春拏獲解送俟各犯到時卽行審明按名正法其歸伍
時旋卽脫逃之吳連貴等六名又現在脫逃之聶富一名
通行飭緝獲日亦卽正法又甯陝中營右營城守華陽西
江口等五營有辭伍遞籍十六名項據各該營稟報係降
匪歸伍後散遣現未傳到_臣等伏思此等降匪歸營後自
應靜候查辦斷無擅准辭伍遞籍之理雖非著名頭目而
該管參將遊擊等並未具稟擅自開除名糧任其回籍甚
屬不合_臣等一面行查各原籍逐名傳到補行遣戍如敢
不服拘拏獲日亦卽正法一面查明係何員任內之事分

別參處以上遣戍一百九十五名已正法二名應正法六
名脫逃七名辭伍遞籍十六名統計數目已足降匪二百
二十六名之數現將遣戍降匪派往塔爾巴哈臺喀什噶
爾烏什阿克蘇四處指定姓名地方與正法緝拏各降匪
分別開具名單並將換防新兵數目一併開具恭呈

御覽俟奉到

諭旨再將換防兵丁遣戍降匪年貌籍貫分造清冊飛咨新疆各
該處遵照辦理

諭曰本日德楞泰全保方維甸奏防戍新兵降匪全數起程分別
開單進呈甯陝降匪據德楞泰等查明共有二百二十六名計

比原數多二名此內除蒲大芳王文龍等一百九十五名俱押赴新疆永遠遣戍又余大貴等二名因酗酒滋事先已正法外其不願換防及推病脫逃之苟文興等六名德楞泰於楊遇春拏獲到時卽行審明正法所辦甚是至此外歸伍脫逃之吳連貴等七名亦罪在不赦不可任令漏網該犯等或在本省潛匿或逃往鄰省均未可定除陝甘二省全保方維甸自己飭緝外其附近之四川湖北山西河南等省現已諭知該督撫等一體嚴拏期於必獲將來拏獲之後自當卽予正法至辭伍遞籍之周連貴等十六名當日歸伍之後營員等原不應准其辭伍但此十六名究係辭退遞籍與聞知換防輒行脫逃者其情罪尙

覺有間儻一經傳喚卽行投到尙可末減其罪發往黑龍江給
兵丁爲奴如竟敢遠颺不遵傳喚則拏獲後亦當正法德楞泰
等應將此十六名內傳喚不到之犯速行知照鄰省一體通緝
所有降匪等派戍之塔爾巴哈臺等四處除已將各犯名單發
交各該處辦事大臣令其分別管束外其年貌籍貫並著開造
清冊卽行移咨爲要